

PM minta peladang guna teknologi moden

7 AUG 1966

KUALA LUMPUR, Rabu — Peladang dan nelayan patut mempunyai fikiran dan sikap terbuka untuk menerima teknologi moden bagi meningkatkan pengeluaran mereka, kata Datuk Seri Dr Mahathir Mohamad hari ini.

Berucap melancarkan perayaan Hari Peladang dan Nelayan Kebangsaan di Pusat Dagangan Dunia Putra (PWTC) di sini, Perdana Menteri berkata mereka juga perlu menyesuaikan teknologi dengan cara-cara kerja mereka bagi memastikan hasil yang memuaskan.

"Ada orang mengatakan kita tidak mungkin menggunakan cara-cara moden untuk menangkap ikan kerana dianggap tidak sesuai, tetapi jika kita tahu menggunakannya ia akan menjadi sesuai," tegasnya ketika berucap kepada kira-kira 5,000 nelayan dan peladang seluruh negara.

Menurut Perdana Menteri, peladang dan nelayan negara ini perlu mempelajari cara-cara baru di bidang pertanian dan menggunakannya bagi mendatangkan hasil yang diharapkan.

Beliau berkata, mereka tidak seharusnya kecewa jika hasilnya

agak mengecewakan di peringkat permulaan.

"Tetapi kalau berusaha, kita akan dapat mengatasi masalahnya dan meningkatkan pengeluaran dengan menggunakan teknologi moden," jelas beliau.

Datuk Seri Dr Mahathir berharap peladang dan nelayan akan mempunyai fikiran dan sikap terbuka untuk menerima teknologi moden bagi menghadapi cabaran dan menyesuaikan dengan peredaran zaman.

Berkorban

Menurutnya, mereka juga patut menerapkan semangat sanggup berkerja keras, berkorban dan mempunyai disiplin bagi meningkatkan pendapatan serta meningkatkan pengeluaran pertanian negara.

Mengenai bidang menangkap ikan, Perdana Menteri mengesyorkan supaya nelayan-nelayan mengguna teknologi moden yang sesuai bagi menjamin hasil tangkapan mereka bertambah.

Katanya, teknologi moden di bidang itu sering berubah kepada

yang lebih baik dan nelayan perlu berusaha untuk menyesuaikan penggunaannya kerana cara tradisional tidak lagi sesuai.

Beliau juga mengingatkan nelayan dan peladang supaya memikirkan cara-cara yang baik untuk mencari pekerjaan supaya hanya segelitir daripada mereka kekal sebagai peladang atau nelayan.

"Bakinya hendaklah menyertai bidang lain kerana selagi kita mengharap kepada tenaga untuk memajukan bidang ini selama itulah pengeluaran pertanian tidak akan meningkat seperti yang dikehendaki.

Katanya, kini sudah ramai orang menggunakan teknologi moden bagi meningkatkan hasil pengeluaran pertanian tetapi masih ramai lagi yang tidak dapat mengikut perkembangan dan kemajuan di bidang berkenaan.

Sementara itu, Perdana Menteri dan isterinya Datin Seri Dr Siti Hasmah dengan diiringi oleh Menteri Pertanian, Datuk Seri Haji Samsudin Junid melawat gerai-gerai di pameran pertanian yang diadakan sempena perayaan Hari Peladang dan Nelayan tahun ini.